

方龍神鎮守邪惡消亡辟除盜賊穢却災殃
解謝之後萬福來祥弟子再拜謹啓

上香 上酒

重啓神君等弟子今日誠心致禮伏願神官
普垂恩祐請勸五方宜符爲其驅遣宅內五
虛六耗黃尸邪魅及以時瘟疫疫疔中外強殍
行客寄鬼雄雌注殺速去千里若宅中地王
害煞發動悉自伏滅願請青龍來下鎮宅東
消却東方青色災禍開水門招集東方五穀
金銀財寶來入願請赤龍來下鎮宅南消却
南方赤色災禍開火門招集南方絲綿絲帛
財寶來入願請白龍來下鎮宅西消却西方
白色災禍開金門招集西方金玉珍奇財寶
來入願請黑龍來下鎮宅北消却北方黑色
災禍開水門招集北方魚鹽牛馬財寶來入
願請黃龍來下鎮宅中央消却中宮黃色災
禍開土門招集四維錢財匹帛珍寶來入五
色神龍鎮遏五方祭謝以後宅神安定門永
戶尉備衛家門禁制百鬼無使來前散滅凶
殃招集福祿令弟子所居所住安鎮百年男

女賢明老少元吉惡口赤舌沒入九陰家口
尊卑常沾五福保宜天祿永祚遐齡六畜滋
繁五穀豐熟錢財運合倉庫充盈仕宦高遷
蠶桑蕃息子孫昌熾門戶興榮舉家擁護
之恩畢代荷神明之德蒙如所願被受洪恩
弟子再拜謹啓

次散食於壇外四方

重啓禮謝三周合座豐足惟諸明祇各還本
府宅內諸神各安其部伏願留恩降福一如
所啓再拜

行事畢收五方飲食埋宅五方門位
飯食埋大門樞側餘盤迴以散食

正一醮宅儀

正一醮墓儀

凡人墓山年月深久或有崩壞須得補葺
或時凶衰地氣王動致令子孫貧耗遭非
橫禍百事不利者須饗祭墓之山川土地
神祇安穩亡人即得子孫平安所向吉利
細席三十五領無席用 大席二領香一兩
小案一面香鑪四具小盤三十五枚黍米
飯五升粳米飯三升粟米飯一升胡桃七
十顆乾棗三十五顆粟子一升餅三十五
枚淨水刀鋤供用竹簾四枚長一丈二尺漆盤
一面小繩一條長三丈六尺銅鏡一面鹽
一斗二升豉一斗二升

右件物隨豐儉量之
於墓近道左治地爲壇方三丈六尺四角
立標壇中央設五方神座次外設二十四
神座次外四方設阡陌座墓前左設亭長
座右設丈人座座列細席一領飲食一盤
所用鎮幣錢物並隨時豐儉但令合五行
四維支千數唯須精新不得穢汙預前一
日潔淨營辦其日設飲食於壇東南祭官

立於壇南祝人在壇西南弟子立於壇東執事升壇布幣進食香鑪於壇內四角

先上香再拜跪讀祝文出家法師但坐不拜

維年歲月朔日某官位無官者州姓里姓名敢昭告于后土五方五行諸神此境山川百靈某

家丘墓阡陌之神往以龜筮襲吉於此山源為亡祖安厝宅兆青龍白虎左右相扶朱雀

玄武前後相對置立坐域整齊阡陌千年萬載永附山源但以年月幽深丘墳蕭索或四

靈失守八將無依蒿里明靈不垂冥祐亡者云

比年以來居家屯坎舉向衰耗無所良宜當得翻失應成却敗錢財流散官事紛紜田種

薄收蠶桑不熟子孫傷天仕宦不遷日甚憂惶無以取濟謹以今日奉齋薄禮并及雜物

庶羞備具獻上至誠奉請后土諸神丘墓丈人二十四位功曹傳送阡陌諸神願並率所

部降臨其位次第而坐饗受所獻弟子再拜

次上香 上茶 上酒

謹重上白后土諸神等某先人末胤奕代承家恐山宅之不安懼宗禋之罔嗣敬以今日

誠心設醮伏乞亡者魂寧於幽室子孫獲慶於將來惟此山岡鬱鬱蒼蒼年年興盛代代富昌上合天文下符地理左陪金匱右帶玉堂男女位備無所不良五方錢財歸流生人子孫富貴仕宦高遷門戶強盛兒女貞賢田蠶豐熟財積如山寶貨充滿車馬駢闐安倉鎮庫豐臨無量亡人受恩利祐子孫弟子再拜

次上香 上酒

向來至誠殷勤奉請馨香既薦言謝已陳禮物輕微意慕欽重仰蒙洪澤饗納微誠再拜三謝之禮悉以周徧鎮謝之物既蒙受納願嚴神駕各還所止請道路將軍瞻察前後淳遊邪魅驅令蒿里丈人丘墓長寧后代子孫昌盛福祐蟬聯一如律令再拜

行事畢其阡陌座物當分埋之於壇東南角舒席於墓前迴食盤與亡人上食呪訖並分散今盡凡平收日不用醮墓凶墓神正月在子寅卯辰申戌亥二月在子亥三月在卯巳午申戌亥四月在巳午未

戌亥五月並同六月在丑卯辰巳未亥七月八月在寅九月在子丑寅辰未戌十月在卯戌亥十一月在子卯辰午未申酉戌亥十二月在丑寅卯辰巳亥右件地犯之殺人凶若去墓十五步外無忌其日亦不得祭墓

正一醮墓儀